

四庫全書

集部

欽定四庫全書

集部

後村詩話卷二

詳校官右中允_臣薩敏

主事銜_臣徐以坤覆勘

總校官編修_臣王燕緒

校對官待詔_臣胡士震

謄錄監生_臣王宮

欽定四庫全書

集部九

後村詩話

詩文評類

提要

臣等謹案後村詩話前集二卷後集二卷續集四卷新集六卷宋劉克莊撰克莊有後村集已著錄所撰詩話惟前集有本別行其餘皆編入文集中共十四卷末有自跋稱前後二集為六十至七十歲時所作續集四卷為

八十歲時所作新集六卷則八十二歲時所作也克莊晚節頽唐詩亦漸趨潦倒如髮脫詩之論為城旦寧非恕度作沙彌亦自佳老吏詩之只恐閻羅難抹過鐵鞭他日鬼臀紅殆足資笑噓然論詩則具有條理真德秀作文章正宗以詩歌一門屬之克莊克莊所取如漢武帝秋風詞及三謝之類德秀多刪之克莊意不謂然其說今載前集第一卷中蓋

克莊於詩為專門而德秀于詩則未能深解
宜其方枘而圓鑿也前集後集續集統論漢
魏以下而唐宋人詩為多新集六卷則詳論
唐人之詩皆採摘精華品題優劣往往連錄
全篇較他家詩話兼涉考證者為例稍殊蓋
用唐詩紀事之例所載宋代諸詩其集不傳
於今者十之五六亦皆賴是書以傳可稱善
本其中如韓詩外傳西京雜記朝野僉載諸

書往往連篇抄錄至一二十條不止以至沈
既濟駁武后本紀之類泛及史事皆與詩無
涉殊為例不純又如謂杜牧兄弟分黨牛李
以為高義而不知為門戶之私謂吳融韓偓
國蹙主辱絕無感時傷事之作似但據唐英
歌詩香奩集而於韓內翰集則殊未詳閱持
論亦或偶踈至于既詆玉臺新詠為淫哇而
又詳錄其續集既稱歐陽修厭薄楊劉又稱

其推重楊劉尤自相矛盾然要其大旨則精
核者多固迥在南宋諸家詩話上也乾隆四
十六年十二月恭校上

總纂官臣紀昀臣陸錫熊臣孫士毅

總校官臣陸費墀

欽定四庫全書

後村詩話卷一

宋 劉克莊 編

故事經筵徹章宸翰賜講讀官詩率取前人絕句淳祐
丙午講禮記畢錫宴秘書省御製七言唐律一首云鰲
極開先已降衷上天下澤禮居中三才義理維持力萬
世綱常建立功孔聖法言多纂輯漢儒師學共脩崇經
帷講徹資羣彥克已工夫在廣充詩既雄渾而奎文綯

金史卷之八十二
卷一
爛行草道麗各為一體侍讀少師鄭公以下拜賜者十
有四人克莊與焉徹章賜御製詩自今上始

施眾減減鱸鮪發發段莢揭揭庶姜孽孽庶士有謁鄭
氏曰庶姜謂姪娣庶士謂媵臣毛氏曰孽孽盛飾余始
悟屈原九章云魚鱗鱗兮媵予之意本此

詩四言尤難以三百五篇在前故也韋玄成云誰謂華
高企其齊而誰謂德難厲其庶而使經聖筆亦不能刪
也曹公短歌行末云山不厭高海不厭深周公吐哺天

下歸心且孔融楊修俱斃其手操之高深安在身為漢
相而時人目以漢賊乃以周公自擬謬矣魏文帝善哉
行云人生如寄多憂何為今我不樂歲月如馳當操無
恙植以才倉舒以惠幾至奪嫡謂之多憂可也及受漢
禪可與天下同樂矣帝既猜阻鮮懼而諸侯王就封者
皆為典籤侵迫多見削奪其末命乃托國于狼顧之仲
達是帝之憂至死未已何時而可樂乎

曹植以蓋代之才它人猶愛之況于父乎使其少加智

巧奪嫡猶反手爾植素無此念深自斂退雖丁儀等坐
誅辭不連植黃初之世數有貶削方且作詩責躬上表
求自試兄不見察而不敢廢恭順之義卒以此自全可
謂仁且智矣文中子曰至哉思王以天下讓真篤論也
贈白馬王彪云丈夫志四海萬里猶比鄰恩愛苟不虧
在遠分日親何必同中疇然後展殷勤憂思成疾疢無
乃兒女仁倉卒骨肉情能不懷苦辛末云離別永無會
執手將何時王其愛玉體俱享黃髮期于時諸王凜凜

不自保子建此詩憂傷忼慨有不可勝言之悲詩中所
謂蒼蠅間白黑諛巧令親疎蓋為灌均輩發終無一毫
怨兄之意處人倫之變者當以為法彰以驍勇斃植以
文義全蓋丕所忌非文人也使倉舒在却未必可存倉
舒天操謂丕輩曰我之不幸汝輩之幸也此語失父道
矣豈所以愛倉舒哉陸機弔魏武文云曩以天下自負
今以愛子托人其言甚可悲也

嵇康幽憤詩云性不忤物頻致怨憎按康傲鍾會不與

語與山濤書自言薄周孔而非湯武其所忤也大矣子
元子上見書自無可全之理况加以士季乎雖欲採薇
散髮頤性養壽豈可得也

四言自曹氏父子王仲宣陸士衡後惟陶公最高停雲
榮木等篇殆突過建安矣

五言見于書詩如萬事叢脞哉胡為乎泥中之類非始
于蘇李也武別陵云欲展清商曲念子不能歸又云願
為雙黃鵠送子俱遠飛陵雖萬無還理武尚欲拔之以

歸漢忠厚之至也

康樂稱太傅為宗衮子建稱孟德為家王皆自我作古
嵇康以非湯武三字殺身如韓亡子房奮秦帝魯連恥
之句謂之反形已具可也康樂安得全乎然康樂若以
改物為恥竊負而逃可也為淵明亦可也既仕宋乃欲
為子房魯連于義未有所安悲夫

阮嗣宗云寧與燕雀翔不隨黃鵠飛黃鵠遊四海中路
將安歸蓋歎時人之安于卑近而自傷其才大志廣無

所稅駕非謂士之抗志甘為燕雀而已嵇阮齊名然勸
進表叔夜決不肯作

文章正宗初萌芽西山先生以詩歌一門屬予編類且
約以世教民彝為主如仙釋閨情宮怨之類皆勿取予
取漢武帝秋風辭西山曰文中子亦以此辭為悔心之
萌豈其然乎意不欲收其嚴如此然所謂攜佳人兮不
能忘之語蓋指公卿羣臣之扈從者似非為後宮設凡
予所取而西山去之者大半又增入陶詩甚多如三謝

之類多不入

詩至三謝如玉人之攻玉錦工之織錦極天下之工巧
組麗而去建安黃初遠矣

陶公如天地間之有醴泉慶雲是惟無出出則為祥瑞
且饒坡公一人和陶可也

潘岳云春榮誰不慕歲寒良獨希若能卻顧長慮者然
身游金谷以賈謚石崇為托歲寒之地悲夫

謝康樂有擬鄴中詩八首江文通有擬雜體三十首名

曰擬古往往奪真亦猶退之琴操真可以絃廟瑟子厚
天對真可以答天問今人號為摹擬某作求其近似者
少矣

贈盧諶詩前歷叙霸王之佐下云中夜撫枕歎思與數
子遊又云功業未及建夕陽忽西流時哉不我與去乎
若雲浮昔蒯通讀樂毅之書而泣余于越石此詩亦然
前作有甚拙者劉越石云宣尼悲獲麟西狩涕孔丘兩
句一事也阮嗣宗云多言焉所告繁辭將訴誰兩句一

意也然不以瑕掩瑜

宋少帝前溪曲云黃葛生爛漫誰能斷葛根寧斷嬌兒乳不斷郎殷勤其才思乃在陳後主隋煬帝之上

魏文帝有見輓船士新婚別妻詩一首庶幾熠熠宵行蠨蛸在戶之遺意呂東萊馬嵬詩云錦襪千年恨皇輿萬里程寧知輓船士亦有別離情輓船事與馬嵬不相涉而善用之如此

焦仲卿妻詩六朝人所作也木蘭詩唐人所作也樂府

惟此二篇作叙事體有始有卒雖辭多質俚然有古意
徐陵所序玉臺新詠十卷皆文選所棄餘也六朝人少
全集雖賴此書略見一二然賞好不出月露氣骨不脫
脂粉雅人莊士見之廢卷昔坡公笑蕭統之陋以陵觀
之愈陋于統如沈休文六憶之類其褻慢有甚于香奩
花間者然則自國風楚辭而後故當繼以選詩不易之
論也

唐初王楊沈宋擅名然不脫齊梁之體獨陳拾遺首倡

高雅冲澹之音一掃六代之纖弱趨于黃初建安矣太
白韋柳繼出皆自子昂發之如世人拘目見酣酒笑丹
經崑崙有瑤樹安得采其英如林居病時久水木澹孤
清閒卧觀物化悠悠念羣生青春始萌達朱火已滿盈
徂落方自此感歎何時平如務光讓天下商賈競刀錐
已矣行采芝萬世同一時如吾愛鬼谷子青谿無垢氛
囊括經世道遺身在白雲舒可彌宇宙卷之不盈分豈
徒山木壽空與麋鹿羣如臨岐泣世道天命良悠悠昔

金匱要略卷之三
日殷王子玉馬遂朝周寶鼎淪伊穀瑤臺成古丘西山
傷遺老東陵有故侯皆蟬蛻翰墨畦邈讀之使人有眼
空四海神遊八極之興

杜審言夜宴云酒中堪累月身外即浮雲登襄陽城云
楚山橫地出漢水接天迴妾薄命云啼鳥驚殘夢飛花
攪獨愁杜氏句法有自來矣

杜五言感時傷事如親朋無一字老病有孤舟如敢料
安危體尤多老大臣如不愁巴道路恐濕漢旌旗其用

事琢對如須為下殿走不可好樓居如竟無宣室召徒
有茂陵求如魯衛稱尊重徐陳略喪亡八句之中著此
一聯安得不獨步千古若全集千四百篇無此等句為
氣骨篇篇都做圓荷浮小葉細麥落輕花道了則似近
人詩矣

古人感知已之遇季布奏事彭越頭下臧洪盧諶皆不
以主公成敗而二其心叔季所謂賓客方翕翕熱時則
趨附恐後及時異事改則振臂而去至有射羿者世傳

嚴武欲殺子美殆未必然觀親老如宿昔部曲異平生
之句極其悽愴至位置武于八哀詩中忠厚藹然異于
幕府少年今白髮之作矣李義山過舊府有寄諸掾詩
云莫憑無鬼論終負托孤心尤有門生故吏之情可以
矯薄俗

唐人善形容人情物態杜公云已經十日竄荊棘困厄
極矣然腰下寶玦青珊瑚終不解去何也義山云不收
金彈拋林外却憶銀牀在井頭亦曲盡貴公子之態態

若貫休輩自拳五色毬進入它人宅却促蒼頭奴玉鞭
打一百之句拙俚甚矣

太白古風云大雅久不作吾衰竟誰陳王風委蔓草戰
國多荆榛龍虎相啖食兵戈逮狂秦正聲何微茫哀怨
起騷人揚馬激頽波開流蕩無垠廢興雖萬變憲章亦
已淪此今古詩人斷案也黃河走東溟白日落西海逝
川與流光飄忽不相待春容捨我去秋髮已衰改人生
非寒松年貌豈長在吾當乘雲螭吸景駐光彩西上蓮

花山迢迢見明星素手把芙蓉虛步躡太清俯視洛陽
川茫茫走胡兵流血塗野草豺狼盡冠纓此六十八首
與陳拾遺感遇之作筆力相上下唐諸人皆在下風
古人服善太白過黃鶴樓有眼前有景道不得崔顥題
詩在上頭之句至金陵遂為鳳凰臺詩以擬之今觀二
詩真敵手棋也若他人必次顥韻或于詩版之傍別著
語矣

玉川子貧甚僧送米令割俸其家必無蓋藏一婢赤脚

必無妹麗所訟惡少騎屋下瞰未必盡然既為捕咎惡
少不以為德反謂處置未是它人處此必怒退之乃異
辭謝之為具招之玉川赴其約又先致雙鯉亦不之卻
舊史稱退之性崛強以玉川事觀之乃一委曲人也然
其與憲宗爭佛骨與御史中丞李紳爭臺參與王庭湊
爭牛元翼與河南尹鄭相爭賣餅軍人則毅然不可奪
崛強于大節而委曲于羣碎此其所以為退之歟

李翱張籍皇甫湜皆韓門弟子翱妻又會女也故退之皆名呼之

如云李翱觀濤江又云籍湜輩然翱祭退之文乃稱為兄弟子
姑未論兄妻之諸父可乎籍祭詩云而後之學者或號為韓張有
抗衡之意湜作墓碑云父疾諭湜曰死能令我躬不隨世磨滅
者惟子以為屬退之乃賴湜而傳耶近世推黃配蘇亦類此

退之性喜玩侮如呂醫山人之類固可侮揚之眾俟喜
諸生也乃況之眾以栢馬又借釣魚嘲喜云舉竿引綠
忽有得一寸纔分鱗與鬐盧仝張籍之齒長矣于盧則
云先生抱材終大用宰相未許終不仕形容其迂濶不

少貸于籍則云君乃崑崙渠籍乃嶺頭瀧譬如蟻蛭微
詎可陵崕嵬贈崔立之云朝為百歲猶鬱怒暮作千詩
轉道緊若服其敏者下句却云才豪氣猛易言語往往
蛟螭雜蟻蚓則多而不精可以槩見其于詩人中惟東
野文人中惟子厚稍加敬

唐僧見于韓集者七人惟大顛穎師免嘲侮高閒草書
頗見貶抑如惠如靈如文暢如澄觀直以為戲笑之具
而已靈尤跌蕩至于醉花月而羅嬋娟此豈佳僧乎韓

公方且欲冠其顛始聞澄觀能詩欲加冠巾及觀來謁見其已老則又潸然惜其無及所謂善謔而不為虐者耶

柳子厚才高它文惟韓可對壘古律詩精妙韓不及也當舉世為元和體韓猶未免諧俗而子厚獨能為一家之言豈非豪傑之士乎昔何文績常語李漢老云如柳子厚詩人生豈可不學他做幾百首漢老退而歎曰得一二首似之足矣何文績從北狩病中詩云歷歷通前

劫依依返舊魂人生會有死遺恨滿乾坤雖意極忠憤
而語不刻急亦學柳之驗

呂溫坐任文黨黜守道衡二州卒于衡柳子厚誄之曰
遷理于道民服休嘉賦無吏迫威不刑加又言二州之
人哭者逾月坡公謂溫小人何以得此然余觀溫集送
江華毛令絕句云布帛精麤任土宜疲人識信每先期
今朝臨別無他囑雖是蒲鞭也莫施太守送縣令之言
如此則子厚所書非溢美矣今世士大夫笑溫者比肩

及為二千石屬縣能督賦者蒙殊獎負殿者受嚴譴有能為溫此言未見其人也

呂溫詩云天下起兵誅董卓長沙義士最先來荆公云江東子弟多才俊卷土重來未可知皆可以倡東南勇敢之氣

王建新嫁娘詩云三日入厨下洗手作羹湯未諳姑食性先遣小姑嘗張文潛寄衣曲云別來不見身長短試比小郎衣更長二詩當以建為勝文潛詩與晉人參軍

新婦之語俱有病

劉長卿七言云欲掃柴門迎遠客青苔紅葉滿貧家魏
野林逋不能及也

洛神賦子建寓言也好事者乃造甄后事以實之使果
有之當見誅于黃初之朝矣唐彥謙云驚鴻瞥過游龍
去虛惱陳王一事無似為子建分疏者

唐人叙述奇遇如后土夫人事托之韋郎無雙事托之
仙客罵罵事雖元稹自叙猶借張生為名惟沈下賢奉

夢記牛僧孺周秦行記李羣玉黃陵廟詩皆攬歸其身
名檢掃地矣

古樂府云新婦初來時小姑始扶牀今日被驅遣小姑
如我長迴頭語小姑勿嫁似兄夫庶幾哀而不怨矣

雍陶送春詩云今日已從愁裏去明年更莫共愁來稼
軒詞云是他春帶愁來春歸何處却不解和愁將去雖
用前語而反勝之

唐失河湟未久司空圖詩云漢兒盡作胡兒語却向城

頭罵漢人燕山自石晉割棄至本朝宣和歷年多矣議者猶以燕人思漢藉口卒召狄難

劉言史贈盛鍊師云大羅過却三千歲更向人間魅阮郎此女道士豈魚玄機之流歟唐人多不矜細行李羣玉有龍門寺佳人阿最歌云何須同泰寺然後始為奴其放潑如此夫陶寫情性如閒情賦可也過則為羣玉矣

唐人多傳盧仝因留宿王涯第中遂預甘露之禍仝老

無髮奄人于腦後加釘馬以為添丁之識或言好事者
為之全處士與人無怨何為有此謗然平時切齒元和
逆黨月蝕一詩膾炙人口意者羣奄因此害之太平廣
記載孝廉許生遇四丈夫與白衣叟會飲于甘棠館西
噴玉泉四人謂叟曰玉川來何遲叟舉壁間所見詩座
中聞之皆擁面欲慟已而叟與四人者各賦一篇蓋王
涯賈餗舒元興李訓與全之鬼也按甘露之謀涯餗不
預元興訓雖狂疎敗事其志與陳蕃竇武何異得罪于羣

奄則有之于社稷無負也身與其宗既塋醢于寺人之
手終唐之世名與叛逆同科僅嘗收葬羣奄又使人發
之投骨渭水子孫或逃依劉從諫苟活旦暮甚可憐矣
及澤潞平被害無噍類詔書猶謂之逆賊之後此何理
也李文饒實當國政刑如此豈畏奄人耶有宿憾于涯
輩耶至昭宗危亂中始有雪涯等之詔噴玉泉詩云李
固有寬藏蠹簡鄧攸無子續清風又云雖有衣衾藏李
固終無表疏雪王章皆可傳誦白衣叟所舉壁間詩云

金史卷一百一十一
卷一
六合茫茫皆漢土此身無處哭田橫妙甚此必是涯元與
門生故吏所作

杜牧之聞慶州趙縱使君與党項戰死詩云將軍獨乘
鐵驄馬榆溪戰中金僕姑死綏却是古來有驕將自驚
今日無青史文章爭點筆朱門歌舞笑捐軀誰知我亦
輕生者不得君王丈二及皇祐中儂賊犯康州闔郡潰
去惟守臣趙師旦死之妻方產子棄之草間亂後訪之尚
呱呱然諸公哀誅惟元厚之云轉戰譙門日欲晡空拳

猶自把戈鋌身垂虎口方安坐命在鴻毛更疾呼柱下
杲卿存斷節袴中杵白得遺孤室餘三尺英雄血不愧
山西士大夫欲與牧詩並驅

樊川集中有李給事詩云元禮去歸緱氏學江充來見
大臺宮又云可憐劉校尉曾訟石中書李名中敏常論
鄭注免歸又忤仇軍容棄官二聯可謂善用事矣

劉夢得五言如蜀先主廟云天下英雄氣千秋尚凜然
勢分三足鼎業復五銖錢得相能開國生兒不象賢淒

京蜀故妓歌舞魏宮前八陣圖云軒皇傳上略蜀相運
神機水落龍蛇出沙平鵝鵲飛波濤無動勢鱗介避
餘威會有知兵者臨流指是非中秋云星辰讓光彩風
露發晶英能變人間世儵然是玉京七言如洛中寺北
樓云高樓賀監昔曾登壁上筆蹤龍虎騰中國書流讓
皇象北朝文士重徐陵偶因獨見空驚目恨不同時便
服膺惟恐塵埃轉磨滅再三珍重囑山僧西塞山懷古
云西晉樓船下益州金陵王氣漠然收千尋鐵鎖沉江

底一片降幡出石頭人世幾回傷往事山形依舊枕寒
流今逢四海為家日故壘蕭蕭蘆荻秋哭呂溫云遺草
一函歸太史旅墳三尺近要離金陵懷古云山圍故國
周遭在潮打空城寂寞迴皆雄渾老蒼沈著痛快小家
數不能及也絕句尤工

夢得貞元間已為郎官御史牛相方在場屋投贄文卷
夢得飛筆塗竄牛既貴未能忘有曾把文章謁後塵之
句夢得答云初見相如成賦日後為丞相掃門人且飭諸

子以已為戒然和令狐相云鮮有一身兼將相更能四面占文章則依然故態此詩幸次楚韵若施之于絢宣止掇兔葵燕麥之怒耶同時八司馬皆高才一斥不復或咎時宰無樂育意惟新史謂貪帝病昏抑太子之明深當其罪後裴度為夢得免播州之行憲宗怒尚未解非但諸公忌才也

夢得歷德順憲穆敬文武七朝其詩尤多感慨惟在人雖晚達于樹比冬青之句差閒婉答樂天云莫道桑榆

晚為霞尚滿天亦足見其精華老而不竭

莫徭自生長名字無符籍市易離鮫人婚姻通木客
星居占泉眼火種開山脊夜渡千仞谿含沙不能射
蠻語鉤輶音蠻衣斑斕布熏狸掘沙鼠時節祠盤瓠
忽逢來馬客恍若驚麕顧腰斧上高山意行無舊路
此劉夢得莫徭蠻子詩也世傳坡詩始學夢得觀此
二詩信然

元稹詠估客云爾又生兩子錢刀何歲平往年黑風

峒賊首詐降朝家以通直郎鎮南僉幕招之不出使其弟來吉州謁帥帥以角妓奉之戲云遺下賊種奈何唐彥謙寒食五言云微微潑火雨草草踏青人本朝王元之詩亦用潑火雨

牧之譽阿宜義山譽衮師後二兒皆無聞退之不譽子姪直言阿買不識字

李義山答令狐補闕云人生有通塞公等繫安危於升沈得喪之際婉而成章簡齋南渡初被召東同時召客

云共談太極非無意能繫蒼生本不同則氣象益開濶
矣

唐任藩詩存者五言十首而已然多佳句衆鳥已歸樹
旅人猶過山贈僧云半頂髮根白一生心地清居然可
愛今人動為千百首而無可傳者

薛能詩格不甚高而自稱譽太過五言云空餘氣長在
天子用平人不但自譽其詩又自譽其材然位歷節鎮
不為不用矣卒以驕恣陵忽憤軍殺身其才安在妄庸

如此乃敢妄議諸葛可謂小人無忌憚者

揚州在唐時最繁盛故張祐云人生只合揚州死蜀都
在本朝最繁盛故放翁云不死揚州死劍南

杜牧許渾同時然各為體牧于唐律中常寓少拗峭以
矯時弊渾則不然如荆樹有花兄弟樂橘林無實子孫
忙之類律切麗密或過牧而抑揚頓挫不及也二人詩
不著姓名亦可辨樊川有續別集三卷十之八九皆渾
詩牧佳句自多不必又取它人詩益之若丁卯集割去

許多傑作則渾詩無一篇可傳矣牧仕宦不至南海別集乃存南海府罷之作甚可笑

韋蘇州話舊云昔事武皇帝無賴恃恩私身為里中橫家藏亡命兒朝持擣捕局暮竊隣家姬司隸不敢捕立
在白玉墀此蓋韋公身在三衛目擊其類如此非自謂也王建羽林行亦云長安惡少出名字樓下劫商樓上
醉天明下直明光宮散入五陵松柏中百回殺人身合
死赦書尚有收城功九衢一日消息定鄉吏籍中重改

姓出來仍舊屬羽林立在殿前射飛禽可與韋詩互看
韋詩律深妙流出肝肺非學力世言其所至掃地焚香
而坐不應為人老少頓異可見前詩寓言爾

子美送孔巢父云若逢李白騎鯨魚道甫問訊今何如
蓋李杜與巢父一輩人也又云詩卷長留天地間釣竿
欲拂珊瑚樹則巢父亦能詩者偶失傳爾子美間關亂
離挺節無所汙巢父後沒王事惟太白坐永王璘事流
夜郎按璘嘗辟巢父而巢父不應可見太白當日去就

欠商量也新史謂白佐璘起兵頗似文致但不當就其

辟爾

李遠贈寫御容李長史云初分隆準山河秀再點重瞳
日月明極工及坡公仰觀眩晃目生暈但見曉色開扶
桑迎陽晚出步就座絳紗玉斧光照廊野人不識日月
角髣髴尚記重瞳光之篇一出光焰萬丈視遠所作真
小兒語

歐陽率更貌寢長孫無忌嘲之云誰令麟閣上畫此一

獼猴好事者遂造白猿之說謗及其親

鄭畋名相父亞亦名卿或為李娃傳誣亞為元和畋為
元和之子小說因謂畋與盧攜並相不咸攜詬畋身出
倡妓按畋與攜皆李翱甥畋母攜姨母也安得如娃傳
及小說所云唐人挾私忿騰虛謗良可發千載一笑亞
為李德裕客白敏中素怨德裕及亞父子娃傳必白氏
子弟為之托名行簡又嫁言天寶間事且傳作于德宗
之貞元追述前事可也亞登第于憲宗之元和畋相于

僖宗之乾符豈得預載未然之事乎其謬妄如此如周
秦行紀世以為德裕客韋絢所作二黨真可畏哉

張籍還珠吟為世所稱然古樂府有羽林郎一篇後漢
辛延年所作云昔有霍家奴姓馮名子都依倚將軍勢
調笑酒家胡胡姬年十五春日獨當壚長裾連理帶廣
袖合歡襦頭上藍田玉耳後大秦珠兩鬟何窈窕一世
良所無不意金吾子娉婷過我廬銀鞍何煜爚翠蓋空
蜘蛛貽我青銅鏡結我紅羅裾男兒愛後婦女子重前

夫人生有新故貴賤不相踰多謝金吾子私愛徒區區
籍詩本此然青于藍

送宮人入道唐人多有此作荆公止選項斯一首云願
從仙女董雙成王母前頭作伴行初戴玉冠多誤拜欲
辭金殿別稱名將敲碧落新齋磬却進昭陽舊賜箏旦
暮焚香繞壇上步虛猶作按歌聲未脫唐體也韋蘇州
詩家鼠高手亦有此作云捨寵求仙畏色衰辭天素面
立天墀金丹擬駐千年貌寶鏡休勻八字眉公主與收

珠翠後君王看戴角冠時從來宮女多相妬聞向瑤臺
總淚垂絕不類韋詩與斯輩竟何以異風俗移人如此
或是韋公戲做時人體爾

牛奇章有夜入真珠室朝遊玳瑁宮之謗張祐上牛相
亦云四十便封侯名居第一流下有綠鬟紅粉之語末
云如君年少貴不信有春愁蓋前詩非謗矣牛李嗜好
如冰炭唯愛石則如一人然贊皇生相門無聲色之好
奇章起寒士備貴人之奉不及贊皇遠矣

唐詩人與李杜同時者有岑參高適王維後李杜者有韋柳
中間有盧綸李益兩皇甫五實最後有姚賈諸人學者學
此足矣長慶體太易不必學王逢原題樂天墓末云若使篇
章深李杜竹符還不到君分豈亦病其詩之淺耶

王鐸盡忠唐室奮討巢賊初卽與鄭畋略同大功垂就
令孜間之于內解其都統鐸詩云三塵上相逢明主九
合諸侯愧昔賢可謂慨然有志者然居亂世要須十分
清苦庶可自全孔明躬耕娶阿承醜女相蜀不殖產其

慮深矣鐸當國家板蕩之際居將相袞鉞之任乃攜妓
妾輜重慢藏冶容行于虎狼之都三百口遂併命于高
雞泊哀哉

後村詩話卷一

欽定四庫全書

後村詩話卷二

宋 劉克莊 編

楊劉諸人師李義山可也又師唐彥謙唐詩雖雕斲對
偶然求如一杯三尺之聯惜不多見五言叙亂離云不
見泥函谷俄驚火建章剪茅行殿濕伐栢舊陵香語尤
渾成未甚破碎若西崑酬唱集對偶字畫雖工而佳句
可錄者殊少宜為歐公之所厭也

王元之被遇熙陵知制誥因抹徐鉉貶商州為內相因議孝章皇后喪貶滁州真皇登極召還將用矣其詩乃云兩制舊臣生白髮一番新貴上青天未幾再謫黃州遷蘄州而卒豈新貴有所未平乎

王元之挽趙中令云太常草儀注全是塋周公足以稱其勛業

魏野五言云常憐李斯首不及嚴光足真處士語也潘閬云白日昇天易清朝取事難野聘名而不至閬叫

呼而求用其詩與張元姚嗣宗何異

潘閨客舍詩土牀安枕穩紙被轉身鳴定非慵便枕玉涼繡被春寒夜者所能道也

詩家評論古人多是書生空言爾晏元獻書平津侯傳云主父仲舒容不得未知賓閣是何人公能客富歐二公子門下然後可以為此言但主父非仲舒之倫宜以汲黯代之

夏英公宮詞云絳脣不敢深深注却怕香脂汙玉簫不

金史四庫全書
減香奩花間之作王岐公夫人閣端午帖子云後苑尋
青趁午前歸來競鬪玉欄邊袖中獨有香芸草留與君
王辟蠹編出新意于綵絲巧粽之外可喜也

將飛更作迴風舞已落猶成半面妝宋景文落花詩也
為世所稱然李義山固云落時猶自舞掃後更聞香李下
句尤妙

君謨以詩寄歐公公答云先朝楊劉風采聳動天下
至今使人傾想世謂公尤惡楊劉之作而其言如此豈

公特惡其碑板奏疏磔裂古文為偶儷者其詩之精工律切者自不可廢歟又云近時蘇梅二窮士爾主張風雅人士歸之自二窮士死文士滿朝而使斯道寂然中絕每念此事竊嘆乃知文士滿朝而詩道寂然不但近歲祖宗盛時因已然矣歐帖在鄭子敬左司家

歐公詩如昌黎不當以詩論本朝詩惟宛陵為開山祖師宛陵出然後桑濮之哇淫稍息風雅之氣脉復續其功不在歐尹下世之學梅詩者率以為淡集中如對上

春田濶蘆中走吏參海貨通閭市漁歌入縣樓白
水照茅屋清風生稻花霜落熊升樹林空鹿飲溪
河漢微分練星辰淡布螢每令夫結友不為子
求郎山形無地接寺界與波分山風來虎嘯江雨
過龍腥之類殊不草草蓋逐字逐句銖銖而較者決不足
為大家數而前輩號大家數者亦未嘗不留意于句律也
蘇子美歌行雄放于聖俞軒昂不羈如其為人及蟠屈
為吳體則極平更妥帖絕句云別院深深夏簟清石榴

開遍透簾明樹陰滿地日卓午夢覺流鶯時一聲又云
春陰垂野草青青時有幽花一樹明晚泊孤舟古祠下
滿川風雨看潮生極似韋蘇州垂虹亭觀中秋月云佛
氏解為銀世界仙家多住玉華宮極工而世惟咏其上
一聯金餅彩虹之句何也山蟬帶響穿疎戶野蔓蟠青
入破窻亦佳句

予美送李生云李生以病廢東入徂徠峯志氣尚突兀
形骸已龍鍾男兒生世間有如絕壑松誤為風雷傷不

與匠石逢哀哉千尺幹摧朽似秋蓬此詩悲壯之甚李
生何如人足以當之竊意子美自謂也

雁湖注半山歸腸一夜繞鍾山之句引韓昌黎詩腸胃
繞萬象非也孫堅母懷妊堅夢腸出繞吳閭門半山本
此見吳志和王賢良龜詩云世論妄以蟲疑冰注雖引
莊子但出處無疑字意公別有所本後讀盧鴻嵩山十
志有疑冰之語又唐彥謙中秋詩云霧淨不容玄豹隱
水寒却恐夏蟲疑乃知唐人已屢用之矣半山挽裕陵

云玉暗蛟龍蟄金寒雁鶩飛挽吳春卿云曲突非無驗
方穿有不行鍊字屬對無遺巧

劉原父咏春草云春草綿綿不可名水邊原上亂抽榮
似嫌車馬繁華處纔入城門便不生貢父絕句云青苔
滿地初晴後綠樹無人晝夢餘惟有南風舊相識逕開門
戶又翻書皆有元和意度不似本朝人詩

劉貢父咏史云自古邊功綠底事多因嬖倖欲封侯不如直與黃金
印惜取沙場萬髑髏往往指王韶李憲輩唐人曹松亦

云憑君莫話封侯事一將功成萬骨枯

王逢原暑旱苦熱云清風無力屠得熱落日著翅飛上
山人固已懼江海竭天豈不惜河漢乾崑崙之高有積
雪蓬萊之遠常遺寒不能手提天下往何忍身去遊其
間其骨氣老蒼識度高遠如此豈得不為荆公所推
富公由并州入相外廷至于舉笏相賀王逢原獨云要
須待見成堯舜未敢輕浮作頌聲所見高于石徂徠一
等矣答孫莘老云生無人愧寧非樂死有天知豈特名

其固窮自守亦士之高致也

王逢原聞雁云萬里波濤九秋後五更風雨一燈旁不待著雁字而題見矣

滕白題汶川村舍云種茶畝接紅霞塢灌稻泉生白石根鰭腹老翁頭似雪海棠花底戲兒孫可入圖畫

坡詩略如昌黎有汗漫者有典嚴者有麗縝者有簡澹者翕張開闔千變萬態蓋自以其氣魄力量為之然非本色也它人無許大氣魄力量恐不可學和陶之作如

海東青西極馬一瞬千里了不能為韻束縛

陳洙書御史臺壁云清朝無事諫章疎竊祿經年卧直
廬惆悵平生不如夢春來三度到溪居與荆公三年衣
染禁城塵撫事茫然愧古人明月滄波江萬頃扁舟長
載夢中身之作暗合

唐子西諸文皆高不獨詩也其出稍晚使及坡門當不
在秦晁之下集中有聞坡貶惠州詩云元氣脫形數運
動天地內東坡未離人豈比元氣大天地不能容伸舒

輒有礙低頭不能仰閒口焉敢效東坡坦率老局促應
難耐何當與道俱逍遙天地外此詩甚佳狀得出

潮田無惡歲酒國有長春草木疑靈藥漁樵或異人花
開不旋踵草薶復齊腰團扇侵時令方書遣書長問學
兼儒釋交遊半士農國計中宵切家書隔歲通關河先
壠遠天地小臣孤山靜似太古日長如小年皆唐子西
惠州詩也曲盡南州景物畧無遷謫悲酸之態七言如
身雜蜚中誰是我食除蛇外總隨鄉驥子能吟青玉案

木蘭堪戰黑山頭亦甚工

後人取前作翻騰勘辨有工于前作者唐子西過田橫墓云滄溟無際何妨死却死東都未耿光乃反退之祭文之意此詩必有謂不獨為橫發

元祐後詩人迭起一種則波瀾富而句律疎一種則煨煉精而性情遠要之不出蘇黃二體而已及簡齋出始以老杜為師墨梅之類尚是少作建炎以後避地湖嶠行路萬里詩益奇壯元日云後飲屠蘓驚已老長乘舴

艤竟安歸除夕云多事鬢毛隨節換盡情燈火向人明記

宣靖事云東南鬼火成何事終待神鋒作爭臣

謂方臘不能為

患直待金人耳

岳陽樓云登臨吳蜀橫分地徙倚湖山欲暮時

又云乾坤萬事集雙鬢臣子一謫今五年聞德音云

自古安危關政事隨時憂喜到樵漁五言云泊舟華容

縣湖水終夜明淒然不能寐左右菰蒲聲窮途事多違

勝處心亦驚三更螢火闇萬里天河橫腐儒憂平世況

復值甲兵終然無寸策白髮滿頭生造次不忘憂愛以

簡嚴掃繁縟以雄渾代尖巧第其品格故當在諸家之上

徐師川聞捷云時時傳破敵日日問修門又云諸公宜努力荆棘已千村陳簡齋感事云風斷黃龍府雲移白鷺洲菊花紛四野作意為誰秋頗逼老杜

宣靖之禍自滅遼取燕始韓子蒼挽中山韓師云金絮盟尤在灰釘事已新語妙而意婉上句指韓下句指童蔡作法當如此

崔德符詩幽麗高遠了不蹈襲蓋用功最深者觀魚云
小魚喜親人可釣亦可網大魚自有神隱見誰能量老
禪雖無心施食不肯嘗時于千尋底霍見如龍章桃花
云如何一朽株孕此千億花雖云行且闌明歲亦再華
豈知世上人一老不復佳過湖云誰見詩顛顛發時鄰
陽湖裏月明知無人為覓昭華管自捲秋蘆片葉吹皆
精詣可吟諷

江端友字子我鄰幾之孫靖康間以布衣召用同時詩

人感慨北狩南渡之作多矣子我云楚欲圖周鼎湯猶
繫夏臺又云比年獎惑犯南斗何日燕人祭北門事的
切而語回互

江子我詠象云倉舒止用兒童計亦能自知爾重輕蓋
用王內翰元之譏玩張相齊賢之語但含蓄而不刻露
爾

朱希直七言如幾許少年春欲夏一番夢事綠催紅過
時不語鶯解事怕客深藏魚見幾人間萬事老無味天

下四時秋最愁五言如剪茅編鶴屋篩米聚雞糧燈昏
鼠窺研雨急犬穿籬皆警策不蹈襲

前輩記朱新仲舍人天氣未佳宜且住風濤如此亦安
歸之聯取其自然不煩斲削然新仲此等句尚多如招
郭侯飲云此時老子興不淺旦日將軍幸早臨如何以
報之青玉案我姑酌彼黃金壘凡引用前人語皆蟠屈
排奐使之妥帖它句如滿地落花春病酒一簾明月夜
登樓相親多謝風標子可款豈無瀟灑侯何從可覓秋

消息忽有先鋒到白頭如水篆行科斗林樵轉畫眉若不經思而俱出人意表讀杜詩云縱之逼論劍收之入檀弓尤前人所未發也

劉屏山題李忠愍集云二帝蒙塵方幸朔六臣奉璽更朝梁叙當時事忠憤悲壯尹少稷聞偽齊入寇云酬功不惜賞千布送死惟堪縛一驢足與前句相上下

先朝上元駕御端門示與民同樂之意而已宣和間燈尤盛至于騎年連月警蹕夜出尹少稷靖康元夕詩云

景龍只是當時路不見金錢打著人劉屏山亦云淒涼
但有雲頭月曾照當時步輦人皆記向來期門之事

汴都角妓卽六李師師多見前輩雜記卽即蔡奴也元
豐中命待詔崔白圖其貌入禁中師師著名宣和入至
掖廷頃見鄭左司子敬云汪端明家有李師師傳欲借
抄不果劉屏山詩云輦轂繁華事可傷師師垂老過湖
湘縷衣檀板無顏色一曲當年動帝王亦前人感慨杜
秋娘黎園弟子之類

茶山種竹云餘子不足數此君何可無上句雖非竹事
不覺牽強荔支云絕知高韵傾琬柱未覺豐肌病玉環
上下句皆切又妙于融化送別云不堪相背處何況獨
歸時行役云一寸客亭燭數聲村舍雞絕似唐人

紹興初敵歸我河南識者知和約之不堅久錢氏之後
自中原遷奉三世喪柩窆于越上諸公皆為哀挽茶山
獨云摸金千騎去埋玉幾人歸可謂妙于用事余為袁
守項容孫被召過袁言自其先世墳域在沙市者皆已

遷葬公安國愈覺矣士大夫得無感慨乎

王嘉叟侍郎柳色知春淺鐘聲覺寺深避虎連村靜分
魚一市腥之句甚佳

初以僧牒鹽鈔充軍儲夏均父詩云坐食今添幾支遁
煮鹽那得百弘羊反本之論也

士大夫當離亂時有幸不幸者簡齋云浮世身難料危
途計易非東萊云後死反為累偷生未有期誦之皆可
悲慨

趙忠簡當國以近臣薦起處士劉致中至則趙去秦代之矣劉報罷歸尹少稷柬之云徒然五侍從不辦一書生史相力薦放翁賜第其去國自是臺評然王景文乃云真翁自了平生事不了山陰陸務觀放翁見詩亦笑云我字務觀乃去聲如何把作平聲押了陸放翁少時調官臨安得句云小樓一夜聽春雨深巷明朝賣杏花傳入禁中思陵稱賞由是知名

古人好對偶被放翁用盡箱紙尾摸牀綾烈士壯

心狂奴故態生希李廣名飛將死慕劉伶贈醉侯
下澤乘車上方請劍酒寧剩欠尋常債劍不虛施
細碎仇空虛腹壘魄曾愛山入骨髓嗜酒在膏肓
手版肩輿鬼仔天公貴人自作宣明畫老子曾聞
正始音牀頭周易架上漢書溫卷熱官醉學究病
維摩無事飲不平鳴乞米帖借車詩麴道士楮先
生土偶天公長劍拄頤短衣掩脰已得丹換骨肯
求香返魂子午谷丁卯橋洛陽二頃光範三書酒

聖錢愚茶七碗稷三升一彈指三折肱天女散花
麻姑擲米虎頭雞肋玉麈尾金褭蹄金鴉嘴玉轆
轤客至難令三握髮佛來僅可小低頭百衲袈裟
鈎帖藏經閣帖摩詰病說法虞卿窮著書讀書十
紙上樹千回風漢醉侯見虎猶攘臂逢狐肯叩頭
天愛酒地埋憂一齒落二毛侵癡頑老叟鑠翁曲
肱縱理竹郎木客百錢挂杖一鉅隨身百甕釐
兩囤棗鍊炭勞薪銅臭飯香記書身大如椰子

忍事癭生似瓠壺笑爾輩愛吾廬僧坐夏士防
秋麈尾清談蠅頭細字巖下電霧中花唐夾寨
楚成臯劍南集八十五卷凡八千五百首別集
七卷不預焉其似此者不可殫舉姑記一二于
此

近歲詩人雜博者堆隊仗空疎者窘材料出奇者費搜
索縛律者少變化惟放翁記問足以貫通力量足以驅
使才思足以發越氣魄足以陵暴南渡而後故當為一

大宗末年云客從謝事歸時散詩到無人愛處工又云外物不移方是學俗人猶愛未為詩則皮毛落盡矣

舊讀楊誠齋絕句云飽喜飢嗔笑殺儂鳳凰未必勝狙公幸逃暮四朝三外猶在桐花竹實中不曉所謂晚始悟其微意此自江東漕奉祠歸之作也鳳雖不聽命于狙公然猶待桐花竹實而飽以花實況祠廩也欲併祠廩掃空之爾未幾遂請挂冠

誠齋挽張魏公云出書民猶望廻軍敵尚疑只十箇字

而道盡魏公一生其得人心且為敵所畏與夫罷相
解都督時事皆在裏許然讀者都草草看了

今人不能道語被誠齋道盡宿草春風又新遷去歲
無江水夜韶樂海棠春貴妃椅中招綺夏瓜處屏仵
文晉殿吳宮猶碧草王亭謝館儘黃鸝春歸使肯平
平過須做桐花一信寒東風染得千紅紫曾有西風
半點香年年不帶看花福不是愁中即病中昇平不
在簫韶裏只在諸村打稻聲六朝未可輕嘲謗王謝

諸賢不偶然山根玉泉仰面飛飛出山頂却下馳自
從廬阜瀉雙練至今銀灣乾兩支雷聲驚裂龍伯眼
雪點濺濕姮娥衣寄言蘇二李十二莫愁瀑布無新
詩羲和夢破欲啟行紫金畢逋啼一聲聲從天上落
人世千村萬落雞爭鳴素娥西征未歸去簸弄銀盤
浣風露一丸玉彈東飛來打落桂林雪毛兔誰將紅
錦幕半天赤光天氣貫山川須臾却駕丹砂轂推
上寒空輟蒼玉詩翁已行十里強羲和早起道無雙

子雲到老不曉事不信人間有許由

放翁學力也似杜甫誠齋天分也似李白

放翁云膽薄沽官釀瞳昏讀監書杜荀鶴云欺春祇
愛和醅酒諱老猶看夾注書二聯皆佳

李伯記丞相過海絕句云假使黑風漂蕩去不妨乘興
訪蓬萊與坡公九死南荒吾不服茲遊奇絕冠平生之
句殆相伯仲異乎李文饒盧多遜窮愁無慘之作矣
卿相陳魏公去位詩云病深老迫宜歸去莫作留侯范

蟲看時公年五十四而其言如此

艾軒讀江西詩云神仙本自無言說尸解由來最下方
山谷與坡公云只欠小蠻樊素在我知造物愛公深屏
山問李漢老疾云欲袖雲門竹箴子室中驅出散花人
愛物友之言也白公云病與樂天相伴住春同樊子一
時歸放翁云九十老農緣底健一生強半是單栖自愛
之言也

陳邦光以金陵降敵游士或題其先壘云牙郎一去香

無蹤惟有青青夾逕松若使人能全此操松應合受大
夫封其家執而訟于郡某守餉士人酒遣去牙郎用唐
人賣國語

范石湖賞海棠云憶向宣華夜倚欄花光妍暖月光寒
如今跼颯嫌風露且只銅瓶滿插看宣華王蜀宮名也
蕭干岩機杼與誠齋同但才慳于誠齋而思加苦亦一
生屯蹇之驗同時獨誠齋獎重以配范石湖尤遂初陸
放翁而放翁絕無一字及之今摘其律古精詣不甚費

研尋者於此著語能奇怪呼天與倡酬疾走建德國
乃為淵明先失脚墮榛莽劉伶扶我還乾坤生長我
貧病怨尤誰湘妃危立凍蛟背海月冷挂珊瑚枝
醜怪驚人能嫵媚斷魂只有曉寒知百千年蘚著
枯樹一兩點春供老枝絕壁笛聲那得到直愁斜
日凍蜂知造化巧能相補得破慳賒與一天秋一
筇時到崔嵬上有底勲勞得結扶秋浩蕩中遙指
點一螺許是定王城稚子推窗窺過鴈數峰乘隙入

西軒眼冷寒梢明數點知他是雪是梅花秋陽直為田
家計饒得漁村一抹紅真誠齋敵手也

故參與龔公行役過一山有老木參天再過其山童矣
居人云巨室以此造室公紀以絕句云千章古木轉頭
空去與人間作棟隆未必真能庇寒士不如留此貯清
風晦翁後見此詩歎曰此龔公一生詩識意謂公初為
諫官負重名晚不必為執政也

黃初季野名士也既登第夢婦人素服扇上題云恨君

青袖短誤妾白羅襪季野遂不肯婚余大父著作與之
友善責以嗣續大義陳魏公素重其人以聶夫人女弟
歸之既娶宛然夢中所見者季野果天無子大父葬之
于吾家祖塋

李鴈湖悼亡云一杯漫道愁能遣幾度醒來錯喚君然
元稹已云怪來醒後傍人泣醉裏時時錯問君此尤其是
暗合若四靈唐碑入宋稀與唐人隋柳入唐疎之句則
是明犯

安晚丞相昭君詩云解攜尤物柔強國延壽當年合議
功意新而理長

杭相李文靖乞去題六和塔云經從塔下幾春秋每恨
無因到上頭今日始知高處險不如歸卧舊林丘

高續古題四聖觀云射熊館暗花扶屐下鵠池深柳拂
舟極藻繪追琢之功二宋殆不能過晚兼都官題直舍
云無詩如鄭谷有髮似馮唐亦警策

趙忠定當國招蔡季通不至猶坐趙黨謫死道州偽禁

方嚴朱文公題其墓云有宋西山先生蔡季通之墓章
泉泣之云鵲叫春林辱贈詩鴈迴湘浦忽傳悲蘭枯蕙
死迷三楚雨暗燈昏礙九疑蚤日力辭公府檄暮年名
入黨人碑烏虜季子延陵字不待鑱詞行可知是時章
泉句律如此宜為一世所宗晚年詩太坦率幾于鳳德
之衰矣

趙南塘挽餘千相云樞前留素仗簾下進黃袍語簡而
事核又云漢閣新圖迴秦箏舊曲長挽鞏仲至云萬卷

非其崇單方或以封有無窮之味和韓仲止懷蹈中弟
云黃臺瓜辭可憐美老根連蒂摘都稀風流遂至爾身
盡衰病况堪吾道非少日槩旗豪索酒暮年絲竹淚沾
衣人生到此將何遣一卷南華坐掩扉立春云蒼規不
與圓生智白髮惟添老在身絕句云我欲將君洞庭野
斜河澹月聽雲和要眇之音也

端平初除拜一新趙南塘起散地掌內制元夕觴客客
散家集有觀傀儡詩云酒闌有感牽絲戲也伴兒童看

金瓶梅詞話卷二
到明余謂康節遂令高卧人歌枕觀兒戲之句蓋局外
旁觀者之言爾若同局而為此言似乎未可

南塘評蹈中詩體貌節奏似韋謝信有之至于慕先儒
而遐想挽名流以自近則居然懸隔南塘惜其未撥棄
浮論可謂名言其豪心俠氣極力揩磨不盡不若南塘
之近道也題會春苑云草荒故苑幾春風尚想花開春
樹紅欲問當時馬王事寂寥殘照野亭中寒食云人家
插柳春將過時節澆松老未歸挽趙從善尚書云先朝

懷族遠平世責人深皆于近體中有遠意

亡友臨川曾景建博學強記無所不通工詩有金陵百
詠同泰寺云此身終屬侯丞相誰辦金錢贖帝歸澄心
堂紙云一幅降箋何用許價高緣寫宋文章荆公書堂
云愁殺天津橋上客杜鵑聲裏兩眉攢皆峭拔有風骨
其少作云九十日春晴意少一千年事亂時多佳句也
曾景建送蔡季通赴貶云四海朱夫子徵君獨典刑青
雲伯夷傳白首太玄經有客憐孤憤無人問獨醒瑤琴

空瑣匣絃絕不堪聽其後景建亦坐詩禍謫春陵而卒
建人朱復之字幾仲多材藝為詩有思致初夏云忽聽
夏禽三五弄新紅突過石榴枝秋日云紅葉老去羞明
鏡推讓朱榮上蓼梢視趙紫芝一樹木犀供夜雨清香
移在菊花枝之句尤覺工緻

黃天谷名春伯白玉蟾姓葛名長庚皆自言得道後死
乃無它異二人頗涉文墨所至墻壁淋漓揮掃能聳動
人谷有詩云半篙春水一蓑烟抱月懷中枕斗眠說與

時人休問我英雄迴首即神仙常訪蟾值其出題壁云
怪訪怪怪不在茅君山來相待

侂冑既誅或托巢鳥以譏當時朝士云衆鳥不喜亦不
悲又復別尋高樹枝

丁卯和議敵索首謀函首予之或為樂府云寶蓮山下
韓家府主人飛頭去和虜高九萬吳山絕句云拂曉官
來簿錄時未曾吹徹玉參差傍人不忍聽鸚鵡猶向金
籠喚太師

范石湖座上客有談劉媿好事者公與客約賦詞游次
公先成公不復作衆亦斂手游詞云暖霽烘晴簾鎖垂
楊籠池罩閣萬絲千縷池上曉光分宿霧日近羣芳易
吐尋并蒂欄邊凝竚不信釵頭雙鳳去奈寶刀被妾先
留住天一笑萬花妬阿嬌好在金屋貯甚秋風易得蕭
疎扇驚塵汗一自昭陽宮閉後墻角土花無數况多病
情傷幽素百花臺上空白露望紅雲杳杳知何處天尺
五去無路次公字子明定夫諸孫禮部侍郎操之子詩

詞皆工

疎明瘦直不受東皇識
留取伴春應肯萬紅裏
怎著得
夜色何處笛曉寒無
奈力若在壽陽宮院
一點點有人
惜王澡身甫落梅詞也
身甫嘗為太常博士

潘枋字庭堅落筆皆不凡
有鍾津懷舊詞云
怕見倚欄
干閣下溪聲閣外山
空有舊時山共水
前歡暮雨朝雲
去不還想是躡飛鷺
月下時時認珮環
月又漸低霜又
下更闌折得梅花獨自看

余涉世齟齬每誦歐公平生名節為後生描畫畧盡之言輒為慨然晚逐于朝交遊皆掉臂去惟湯伯紀寄詩云唐朝空自貴宏詞科目何嘗得退之掌制徒聞誇子厚殘篇僅見命敦詩堪嗟實錄無完傳太息淮西有後碑寄語莆田紫薇老文章蓋世例如斯余固不足以當此詩然在西掖草制七十不止一首伯紀未之見耳

後村詩話卷二

欽定四庫全書

集部
後村詩話卷三至五

詳校官石中允臣薩敏

主事銜臣徐以坤覆勘

總校官編修臣王燕緒

校對官編修臣勵守謙

謄錄監生臣劉贊化

欽定四庫全書

後村詩話卷三

宋 劉克莊 編

東坡中秋詩云此生此夜不長好明月明年何處看與
高適今年人日空相憶明年人日知何處之句暗合羅
隱中秋不見月詩云只恐異時開霽後玉輪依舊養蟾
蜍本以廬仝月蝕詩然尤簡明林和靖絕句云山水未
深猿鳥少此生猶擬別移居直過天竺溪流上獨樹為

橋少結廬然賈島已云猶嫌住處人知處見擬移家更
上山楊誠齋五言詩云猶道山中淺仍移水上居俗人
又剝啄棹入白芙蕖亦本此

盧綸李益善為五言絕句意在言外綸傷秋云歲去人
頭白秋來樹葉黃搔頭向黃葉與爾共悲傷宮詞云玉
砌紅花樹香風不敢吹春風解天意偏發殿南枝學士
院春帖子可用又云辭輦復當熊傾心奉六宮君王若
看貌甘在衆妃中益送人云路傍一株柳此路向延州

延州在何處此路起悠悠照鏡云衰鬢朝臨鏡將看各
自疑慙君明似月照我白如絲陽城烽舍云何地可潛
然陽城烽樹邊今朝望鄉客不飲北流泉皆有無窮之
味劉幽求功業人不以詩名其五言云心為明時盡君
門尚不容田園蕪沒盡歸路路何從裴晉公題太原廳
壁云危事經非一浮榮的是空白頭官舍裏今日又春
風皆微婉不刻露頃選絕句或未見前集或偶漏落可
收入也石林避暑錄載楚州紫極宮壁間詩云宮門閒

一入獨凭欄。千立終日不逢人。朱頂鶴聲急亦可收。

賈島哭孟郊云。家近登山道。詩隨過海船。此為郊寫真也。及哭張籍云。即日是前古何人耕。此墳施之他人。皆可何必籍也。籍儘有可說。今八句無一字著題。良不可曉。王簡卿侍郎題園扉。只教人種菜。莫誤客看花。陳抃齋樞密則云。寄語園丁勤剗草。有時病叟出看花。尤有味。辛幼安晚題桃符云。身為僧禪老家因。赴詔貧杜子所。則云父子俱開國。朝廷不負人。兩聯皆微而婉。

賓戲犯客難洛神賦犯高唐賦送窮文犯逐貧賦貞符
犯封禪書王命論洪氏隨筆記阿房賦犯華山賦中語
余讀陸修長城賦首云千城絕長城列秦民竭秦君滅
不覺失笑曰此豈非蜀山兀阿房出之本祖歟修名輩
在樊川前

唐人交疎貧病後身老是非間之句可諷咏

闕

侍郎嘗自誦其贈劉改之一聯云罵坐有人皆
辟易處窮無鬼敢挪揄道得他著

福州仁王寺有僧喜唱望江南詞一日忽題壁曰不嫌
夫婿醜亦勿厭深村但得一迴嫁全勝不出門或謂之
曰此僧欲出世矣言于當路延主一刹未久若有不樂
者又題云當初只欲轉頭銜轉得頭銜轉不堪何似仁
王高閣上倚闌閒唱望江南李內翰元善每稱此二絕
倦遊輒曰吾欲唱望江南矣

李義山蟲賦云爾職惟吃而不善吃回臭而多跖香而
絕雖甚簡短然有義味

近人長短句多脫換前人詩句如七夕詞云今夜為情
忙人那得工夫送巧然羅隱已云時人不用穿針待沒
得心情送巧來送別詞云不如飲待奴先醉圖得不知
郎去時然劉駕已云我願醉如泥不見君去時宮詞云
一夜御前宣住六宮多少人愁然王建已云聞有美人
新進入六宮未見一時愁

王岐公宮詞云翠眉不及池邊柳取次飛花入建章雖
本王昌齡玉顏不及寒鴉色之句然殊不相犯又云重

教按舞桃花下只踏殘紅作地裯又云吹回一覺昭陽
夢帳外春風太薄情其意致在王建之上

退之自負去陳言然坐茂樹濯清泉即楚詞飲石泉蔭
松栢也飄輕裾翳長袖即洛神賦揚輕袿翳修袖也豈
非熟讀忘其相犯耶

前史謂禰衡附孔融慢曹操操以其才名不欲殺送劉
表後復慢表表不能容以江夏太守黃祖性急送衡與
之為祖所殺按鸚鵡賦極籠檻託之悲有母子伉儷

衆雖之感又云寧順從以遠害不違忤以喪生又云顧
六駟之殘毀雖奮迅其馬如苟竭心于所事敢背惠而
忘初噫衡自知不免哀鳴躑躅求容于祖者如此亦可
憐已時操表皆欲篡漢而融獨欲存漢衡與融善自無
可活之理操能害融而不忍斃一衡表亦避此名惟祖
凶麤敢于下手原其意不過一時麤豪風旨爾豈性急
之罪哉頃見余子壽云謝希孟為某總餉所惡假手留
鑰張定叟劾去之希孟有詩云上有皇天下后土此身

不患無歸所憑誰說與清河公何苦為人作黃祖余謂
祖為曹劉驅使已可笑又有一種人為祖驅使更可笑
也

退之有答柳柳州食蝦蟇詩是柳倡而韓和矣今柳集
乃無此作唐家數詩往往一集可采者止一二首餘皆
不必傳而傳子厚詩

缺

者可惜也周六周七輩能登科而不能收拾父詩必是
其尚幼

山谷以崇寧甲申謫宜州道由洞庭潭衡永桂皆有詩
是歲五六月間至宜明年乙酉九月卒年六十一以集
考之在宜僅有七詩與黃龍清老三首別元明一首和
范寥二首而絕筆于乞鐘乳一首豈年高地惡而然耶
其別元明猶云術者謂吾兄弟壽俱八十蓋亦不自料
大期止此少游在藤自作挽歌之屬比之尤悲哀惟坡
公海外筆力益老健宏放無憂患遷謫之態黃秦皆不
能及李文饒亦不能及

秦會之常記曾南豐辟陳后山為史屬且塗改后山史
藁世謂元無此事乃秦謬誤殆以人廢言也按魏衍為
后山集記明言元豐四年神宗命曾典史事曾薦后山
為屬朝廷以白衣難之行乃后山高弟集集記作于政和
五年秦說有按據非誤

后山生不肯著趙挺之丞相背心其死也友人鄒道卿
買棺以殮二事尤偉魏衍作集記不敢書前事豈趙公
方貴盛有所避就乎

余舊喜杜牧憶李給事詩云元禮去歸維氏學江充來
見犬臺宮妙于用事維犬借對尤工後讀膺傳居綸氏
教授千人非維氏也牧豈別有所本耶

杜牧常為牛奇章公掌書記後誌牛公墓書維州事是
牛而非李又云李太尉專柄多逐賢士牧弟顓常為李
衛公巡官後李貶袁州牛公欲辟致顓辭以李公方在
困不願就牧誌顓墓備載其事牛李相反如冰炭門下
各分朋黨二杜于其時一為牛客一為李客各行其志

各主其所主不以牛李之存沒用舍為向背其兄弟俱
豪傑之士矣自唐至今維州曲直之論未定惟溫公是
奇章與牧之論同

徐黃先輩詩如豐年甲子春無雨良夜庚申夏足眠如
身閒不厭常來客年老偏憐最小兒皆律切又五言云
歲計懸僧債以此知閨人苦貧貸僧而取其息自唐末
已然矣但近歲取諸僧者愈甚十剎九廢有歲收數千
百斛盡入豪右而寺無片瓦者則前世之所未有也

前輩稱王君玉詩刻琢深淳且舉蠶寒冰繭瘦蜂老露
房敲魚寒不食清池釣鶯靜頻驚小閣棋二聯余以其
集考之五言如露槿東西照風荷向背愁七言如涼吹
易成團扇恨夕陽偏結小牕愁如詠明皇云誰將水調
歌秋鴈不遣君王待曲終絕句如香溪春老誤尋芳只
有愁雲映夕陽今日重來已如此何須更問海生桑如
正月初弦二月賒小園春事已如麻強誇力健因移石
不減公忙為種花皆精妙有思致絕句可入選而詩話

所稱二聯乃不在集中君玉晏元獻客也嘗與楊大年
歐公唱和

劉駕古意云新人莫歡喜故人曾如此燕趙猶生女郎
豈有終始比之香山更有新人勝于汝之句稍含蓄

漢以孝廉取士其末也孟德仲謀皆曾舉孝廉來唐人
尤重進士其末也如李振勸朱溫一日殺司空裴贇等
百餘人于白馬驛蘓楷進昭宗諡李山甫教樂從訓宮
王鐸一家三百口皆不得志于場屋者為之乃至巢寇

亦進士也科目之弊如此當時惟羅隱有時聲屢擯于
名場然逢世亂離依錢氏以庇身未嘗失節五言云四
海霍光第六龍張奉營此必是諸鎮皆封王賜功臣號
及岐汴劫質天子之時又云陪臣無以報西望不勝情
又聞幸蜀七言云靜憐貴族謀身易危惜文皇初業難
猶有惓惓本朝之意可嘉也司空表聖有書與李生論
詩略云王右丞韋蘓州澄澹精綴豈妨適舉賈浪仙雖
有警句視其全篇意思殊餒大抵

才

亦為體之不備也余謂四靈輩

闕

自摘其警言

聯二十六如人家寒食月花影午時天雨微吟足思花
落夢無憀樂府云晚粧由拜月春睡更生香七言云得
劍乍如添健僕亡書久似憶良朋皆甚佳然世人惟誦
其基聲花院靜幡影石幢高綠樹連村暗黃花入夢稀
之句表聖有絕句云後生乞汝殘風月自作深林不語
僧其高自標致如此

退之以師道自任自李翱張籍皇甫湜輩皆名之惟推

伏孟郊待以畏友世謂謬敬非也其自歎云愁與髮相
形一愁白數莖有髮能幾多禁愁日日生古若不置兵
天下無戰爭古若不置名道路無敬傾太行聳巍我是
天產不平黃河奔濁浪是天產不清四蹄日月多雙輪
日月成二物不在天安能免營營弔國殤云徒言人最
靈白骨亂縱橫如何當春死不及羣草生堯舜宰乾坤
器農不器兵秦漢盜山岳鑄殺不鑄耕天地莫生金生
金人競爭灞上輕薄行云自歎方拙身忽逢輕薄倫常

恐失所避化為車轍塵遊子吟云慈母手中絲遊子身
上衣臨行密密縫意恐遲遲歸誰言寸草心報得三春
暉去婦云君心匣中鏡一破不復全妾心竊中絲雖斷
猶牽連安知御輪士今日翻迴轅一女事一夫安可再
移天君聽去鶴言哀哀七絃教坊歌兒云十歲小小
兒能歌得朝天六十孤老人能詩獨臨川去年西京寺
衆伶集講筵能嘶竹枝詞供養繩牀禪能詩不如歌悵
望三百篇長安旅情云盡說青雲路有足皆可至我馬

亦四蹄出門似無地玉京十二樓
峩峩倚青翠下有千
朱門何門薦孤士秋懷云詈言
不見血殺人何紛紛聲
如窮家犬吠竇何閭閻古詈
舌不死至今書云云秦火
不熟舌秦火空熟文贈無本
云詩骨聳東野詩濤湧退
之有詩踉蹌行人驚鶴阿師
可惜李杜死不見此狂癡
又云十月鯨口邊何人免為
吞游俠行云平生無恩讐
劍閒一百月弔元魯山云黃
犢不知孝魯山自駕車非
賢不可妻魯山竟無家將謠
魯山德順海誰能涯當舉

世競趨浮艷之時雖豪傑不能自拔孟生獨為一種苦
淡不經人道之語固退之所深喜何繆敬之有

文字意脉人生通塞繫焉東野詩云萬物皆及時獨予
不覺春又云妾恨比斑竹下盤煩冤根有笋未出土中
已銜淚痕又云無子抄文字老吟多飄零有婦吐向牀
枕席不解聽又云山壯馬力短路行石齒中又云後路
起夜色前山聞虎聲其峽哀杏殤哭劉言史盧殷諸
篇極其詭怪幽憤所謂峽哀者似為逐客而作如

云沙稜箭箭急波齒斷斷開呀彼無底吮待此不測災
谷號相噴激石怒爭旋迴古罪有復鄉今累多為能其
辭可以痛哭不知哀何人也屈宋大招招魂等作雖窮
極天地之外龍蛇鬼魅千變萬態然又稱述宗國宮室
鐘鼓歌舞之樂以返之孟生純是苦語畧無一點溫厚
之意安得不窮此退之所以欲和其聲歟

孟詩亦有平淡閒雅者但不多耳如腰斧斫旅松手瓢
汲家泉如不是城頭樹那棲來去鷗如路喜到江盡江

上又通舟願為馭者手與郎回馬頭如處處得相隨人
那不如月皆與唐人同一機杼詠蚊云願為天下慟一
使夜景清燭蛾云天若百尺高應去掩明月又唐人所
不能道

王贊序方干詩云張祐升杜甫之堂方干入錢起之室
祐尤為杜牧所稱林逋亦有張祐詩牌妙入神之句牧
逋非輕許可者干送喻鳧云送我樽前酒與君身上衣
又云寒蕪隨楚盡落葉渡淮稀又坐月何曾夜聽松不

似晴窓接停猿樹崑飛浴鶴泉考功以五言擅名干亦云纔吟五字句又白幾莖髭入室之評不為過矣

荆公選唐百家詩于高適岑參各取七十餘首其次王建皇甫冉各六十餘首冉詩佳句如殘雪入林路深山歸寺僧如那堪閉永巷聞道選良家如借問承恩者雙蛾幾許長皆不在選中冉弟曾詩亦工如寒磬虛空視孤雲起滅間如孤村明夜火稚子候歸船如三徑荒蕪羞對客十年衰老愧稱兄皆精妙亦不入選余嘗謂如兩

皇甫五竇皆唐詩高手野處洪公所謂竇氏聯珠集恨未之見

劉義嘲退之諛墓豈惟退之哉蔡中郎自謂平生作碑惟于郭有道無愧詞則他碑有愧者多矣李北海為諫官時面折廷諍是甚氣魄其詞翰俱妙碑板滿天下外國至持金帛購求及為葉有道碑稱美其孫景龍觀道士鴻臚卿越國公法善為帝傲吏作人宗師以臺閣名士而為一黃冠秉顯揚之筆讀之可發千載一笑史謂

自古粥文獲財未有如邕之盛豈非法善輩潤筆耶使
皆為郭泰作碑昌黎安得數斤之金北海安得珊瑚鉤
騏驎劇與紫駟劍几之玩乎

郎士元車馬雖嫌僻鷺花不棄貧秦系流水閒過院春
風為閉門善狀幽居者唐求沙上鳥猶在渡頭人未行
樹色野橘暝雨聲孤館秋善狀行役者周賀空將未歸
意說向欲行人張蠟共看今夜月獨照異鄉人善狀離
別者賀又云雨雪生中途干戈阻後期蠟云塞深行客

少家遠識人稀善狀邊地者蠟又有宮詞云日透珠簾
見冕旒六宮爭逐百花毬迴頭不覺君王去已聽笙歌
在遠樓甚工

唐人為樂府者多如劉駕鄰女篇云君嫌鄰女醜取婦
他鄉縣料嫁與君人亦為鄰所賤菖蒲花可貴只為人
難見祝河水篇云河水清瀾瀾照見遠樹枝征夫不飲
馬再拜祝馮夷從今億萬歲不見河濁時語簡味長欲

逼王建

鄭谷多佳句而格苦不高甚推尊薛能自負不淺其實一縲妄人爾其黃河太華二篇尤自夸詡然以弱筆賦巨題每篇押十四韻殊無警策曾不如司空表聖地勢遙尊岳河流側讓闕十字道盡尚不足以望表聖如吳楚東南坼乾坤日夜浮齊魯青未了等句法何常蘊見彷彿谷輩北面之良不可曉

魏野詩除前輩拈出數聯之外如棋退難饒客琴生却問兒松風輕賜扇石井勝頒冰鴈急長天外驢迷落照

中又咏菊云五色中偏貴千花後獨尊皆逼姚黃而少
有誦之者

五言尤難工林和靖一生苦吟自摘出十三聯今惟五
聯見集中如隱非秦甲子病有晉春秋水天雲黑白霜
野樹青紅風回時帶笛煙遠忽藏村如郭索鉤輶之聯
皆不在焉七言十七聯集逸其三向非有摘句圖傍證
則皆成逸詩矣梅聖俞作集序謂先生詩未嘗自貴就
輒棄之所存百無一二蓋實錄云

黃庶亞夫山谷之父也所誦怪石絕句之外如書對
聖賢為客主竹兼風雨似咸韶如史解幾人惟戮古地
能埋死只埋愚皆奇崛不蹈襲如大孤山不知天星何
時落春秋不書不可尋如宿趙屯云蘆花一股水弭棹
日已暮山間聞鷄犬無人見烟樹行逐羊豕跡始識入
市路菱芡與魚蟹居人足來去漁家無鄉縣滿船載稚
乳鞭笞公私急醉眠聽秋雨雜之谷集中不能辨谷常
手書此二詩刻于星子灣跋云先君平生刻意于詩與

子美吾祖詩冠古之評何異亞夫真黃氏之審言矣

曾子固明妃曲云丹青有迹尚如此何況無形論是非
諸家之所未發哭尹師魯云悲公尚至千載後況復悲
者同其時意甚高挽丁元珍云鵬來悲四月鶴去遂千
年尤精切北歸絕句云江海多年似轉蓬白頭歸拜未
央宮堵牆學士爭相問何處塵埃瘦老翁極似半山誰
謂子固不能詩耶

前輩詠蝶云狂隨柳絮有時見舞入梨花無處尋乃脫

換唐人白鷺詩立當青草人先見行近白蓮魚未知之
句耳

古今賦咏閨情者不過恩怨相爾汝賀方回詞云揮金
陌上郎化石山頭婦無物繫君心三歲扶牀女陳子高
絕句云壁間衛玠眉目是膝下枚臯言語真縱使無情
似郎主那能對此不需中乃就幼稚上發意尤新前世
惟蔡琰胡笳諸篇為然子高別有句云莫向邊鴻問消
息斷腸書信不如無甚有思致

唐有雙角犢子恣狂顛之謠故周子諒彈牛仙客以為
姓符識書李文饒亦謂牛奇章懷異志于圖識恨不族
之又欲以太牢少長俱真之法朱新仲云信識書而誣
人以大逆李竄海島周杖死朝堂報也又云終唐之世
無牛姓為盜者夫犢子雙角殆朱字爾泚問鼎于前
溫改物于後識亦有時而驗耶

王民瞻題石人峯云偉岬稜稜似立朝巍峩冠劍想風
標可憐有貌無肝膽何用昂然近紫霄其托諷與退之

石鼎之作何異

梁邵陵王代舊姬云怨黛舒還斂啼粧拭更垂武陵王
夜夢云昨夜夢君歸賤妾下鳴機懸知君意薄不看去
時衣施榮泰咏昭君云唧唧撫心歎蛾眉誤殺人姚翻
夢故人云覺罷方知恨人心定不同誰能對角枕長夜
一邊空雖南朝人語駸駸入晚唐矣

春端帖子前輩有絕工者有不甚工者坡公欲使秦郎
供帖子豈非以其才思尤宜用于此耶少游不歷此官

無以驗工拙周美成亦有才思者集中有代內制作春
帖子三十首皆平平無警策余嘗忝倖直幸不當筆
爾否則亦露拙矣偶讀誠齋詩云玉堂著句轉春風諸
老從前亦寓忠誰為君王供帖子丁寧綺語不須工使
此老為之必有可觀

秦相當國桂師胡舜陟謂古縣乃秦父舊治諷縣立祠
令高登彥先也為太學諸生時屢上書與陳東齊名既
登第考試潮州以論題策問忤秦相者以為不可祠舜

陟怒据它事劾上興獄逮捕彥先母死舟中而彥先航海投匭上書乞納官葬母秦素蓄恨下彥先靜江獄比至舜陟為渭呂源發買馬事先下吏死秦人皆哀舜陟之非辜而不知有天道焉舜陟謫秦而死彥先忤秦而生亦可為士大夫謬用其心者之戒高端午詩云無邪煩父子有愠賴桐孫用事斷對深于五言者

鶴相在海外效唐李嶠為單題詩一句一事凡一百二十篇寄洛中子孫名青衿集徐堅初學記之類也貶所

無書籍而默記舊讀歷歷不忘且篇篇用李韻又自序云三歲欲齒諸兄行冠禮祖母曰女能諷五七言詩數十章當從汝志翌日能誦之遂免總角六七歲侍祖母讀華嚴經即解句讀辨難字十四五舉業為前輩推賞擢高第登貴仕皆早學之力又云家僕至得珙書筆札精麗字字可愛又得諸孫簡牘各言日夕所學知患難之間不廢素業曠然忘遠遷之意今之貴人位望稍通顯便放下書冊子弟怙勢崇侈為不肖而已鶴相處禍

患遷謫乃能以學自娛又能以學勵其子孫有過人者
不可以人廢也坡公書易論語注成于僭耳胡明仲
讀史管見作于新州又非鶴相口耳記誦之學所及
欲驅殘臘變春風只有寒梅作選鋒莫把疎英輕闔雪
好藏清艷月明中楊龜山為胡文定作也千畝寒林一
樹梅自妍自笑已堪哀今朝更被風吹却擬遣春從底
處回項平庵為朱文公作也二詩一欲文定瑣闥之留
一惜文公經筵之去

李侍郎似之詩云老子因何一念差肯將簪紱換袈裟
折樞密仲古南遷寄李相伯紀云待公輔佐中興了乞
取袈裟送暮身二公一為侍從一為執政晚年乃有袈
裟之美其誰信之

楊文公談苑云近世錢惟演劉均首變詩格得其格者
蔚為佳咏又云二君麗句絕多且各舉數十聯錢詠漢
武云立候東溟邀鶴駕窮兵西極待龍媒劉咏明皇云
梨園法部兼胡部玉輦長亭更短亭工則工矣余按首

變詩格者文公也自歐陽公諸老皆謂崑體自楊劉始
今文公乃遜與二人若已無與者前輩謙厚不爭名如
此文公亦詠漢武云力通青海求龍種死諱文成食馬
肝待詔先生齒編貝那教索米向長安明皇云河朔叛
臣驚舞馬渭橋遺老識真龍蓬山鈿合空傳信回首風
濤百萬重比之錢劉尤老健公孫賀當拜相涕泣不肯
受印綬蔡謨寧免為庶人不肯當司徒之拜然賀不能
堅辭而覆族謨能固拒而全身如謨者可謂智矣南朝

人云我為公計不如飲酒樂劉乂詩云盡欲調太羹今古無好手所以山中人兀兀但飲酒皆名言也

王質景文與王樞使公明詩云試看公出手毋謂我無人與虞丞相云寄身江漢歸無所開眼乾坤見有公甚雋快但下聯云修造鳳樓須有手住持烏寺可無人幾于自粥矣

臨川危逢吉詩有思致禽言二首尤佳接客篇云接客接客高亦接低亦接大兒穩善會傳茶小兒踉蹌能作

揖家人不用剪髻雲我典唐書充饌設唐書典了猶可
贖賓客不來門戶俗郭公篇云郭公郭公聞爾失國春
秋時何事到此猶悲啼郭公前言亡國故當時只緣臣
子誤百年社稷不得歸而今家住柘岡西滿目春風都
是恨聲聲說與齊侯知郭亡矣君勉之詞意音節欲迫
張籍王建矣題楊妃齒痛圖云痛入香齟欲不禁三郎
心痛亦何深當時更有脣亡處自是君王不動心婦嘆
云記得蕭郎登第時謂言即日鳳凰池而今老等閒官

職日欠人錢夜欠詩落花云馬嵬路險失妃子金谷樓
高墜綠珠皆清婉可愛然古今咏落花無出二宋兄弟
兩聯追琢精妙逢吉語稍率矣

後村詩話卷三